



Nuuk 22. marts 2019

UPA 2019/58

UPA 2019/181

Jens Napätôk, Partii Naleraq

Immiaaqqat aalakoornartortaqqanngitsut eqqunneqarsinnaaleqqullugit nioqqutaalersinnaaqullugillu immiaaqqat imeruersaatillu puui pillugit nalunaarummut (Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaannut nr. 16, 28. maj 2002-imeersumut) ilaajunnaarseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Immiaaqqat imeruersaatillu qillertuusaniittut Kalaallit Nunaanni tamarmi nioqqutaalersinnaaqullugillu immiaaqqat imeruersaatillu puui pillugit nalunaarut allannorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasilluni qillertuusat aamma kalaallit nunaanni utertitsisarnermut ilaalersillugit.

(Inatsisartunut ilaasortaq Nivi Olsen, Demokraatit)

Inatsisartut aalajangiiffigisassaattut siunnersuutit immikkoortut marluk ataatsimut siullermeerneqarlutik suliaakkiissutigineqarneranut Partii Naleraqqamiit Naalakkersuisut peqquneqarnissaannik Inatsisartut aalajangiiffigisassaattut siunnersuutit imatut oqaaseqarfigissavagut.

Imm. 58

Inatsisartunut ilaasortaq Justus Hansen, Demokraatit Naalakkersuisut peqquneqarnissaannik Inatsisartut aalajangiiffigisassaattut siunnersuuteqarputit immiaaqqat aalakoornartortaqqanngitsut eqqunneqarsinnaaleqqullugit nioqqutaalersinnaaqullugillu immiaaqqat imeruersaatillu puui pillugit nalunaarummut ilaajunnaarseqqullugit.

Inatsisartunut ilaasortaq Justus Hansen Partii Naleqqamiit qujaffigerusuppatsigit taamatut siunnersuuteqarninnut.

Siunnersuutigisat imarisaa misissorluareerlugu oqaatigisinnaavarput Partii Naleqqap anguniagaanut, eqqarsartariaasitsinnut naapertuullunilu tulluurtuusooq.

Partii Naleqqamiit anguniarlugulu pingaartitaraarput namminersortut atugaat aporfissalersornagit periarfissarsionnissaat, taamaammat isumaqarluinnarpugut peqqussutit suliarineqarlutik atuutilersinneqartartut aporfissalersuisuunatik periarfissaqartitsinerusariaqartut namminersortut eqqarsaatigalugit.

Taamatullu anguniagaraarput nunatsinni nioqqutissiarineqartut imatut periarfissalersorneqassasut nunatsinneersut periarfissarsionneqarluassasut illersorneqarlutillu, taamatullu oqareerluta aamma

pingaartitarilluinnarparput pisisartugut pitsaasumik killilersugaannginnerusumillu toqqagassaqaarsinnaassasut.

Pinngortitap innarlitsaaliornissaa siunertaralugu Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaannut nr. 16, 28. maj 2002-imeersoq siunertaa ajunngikkaluartoq isumaqarpugut maannakkut Naalakkersuisut siunnersuuteqartumut ammaassinerminni peqqussutip siunertaa innarlilaaaraat taamaammallu piaartumik puukut qillertuusat allallu ilanngullugit utertinneqarsinnaanngornissaat piaartumik aqutissiuuttariaqaraat Partii Naleqqamiit isumaqarpugut.

Partii Naleqqamiit isumaqarpugut immiaaqqat imeruersaatillu kulsyrimik akullit kisimik pinnagit puukut assigiinngitsut utertissinnaanngornissaat piaartumik aqutissiuuttariaqartoq, taamaaliornikkut aamma una ajornartorsiut qaangerneqarsinnaassagaluarpoq puukut assigiinngitsut utertinneqarsinnaanngortuuppata.

Nunani allani ajornaqutitaqanngitsumik puukut nioqqutigineqartut utertinneqarsinnaanngorlugit niuertarfiit nioqqutigisaminnik utertitsisarnissamut aaqqissuussinikuupput, taamaammallu periarfissaavoq, taamatut aqutissiuinissaq.

Qillertuusanut naqitsiviit inikittunngortitsisartut nunatsinni periarfissaalluernerat atuutilersinnaaneranut ilanngullugu aqutissiuisoqartariaqarpoq.

Piffissanngorpoq niuertarfiit namminersortullu tuniniarsinnaasai aporfissalersorunnaarlugit periarfissarsiornissaat, taamatullu aamma pisisartut pisiarusuttagaat aqutissiuunneqarnissaat piffissanngorsorinarmat, ineriartornermut naleqquttumik ullutsinnullu naleqquttumik aaqqiisoqartariaqalerpoq aporfissalersuineq naammaleqaaq.

Naalakkersuisut siunnersuuteqartup siunnersuutaanut akuerineqarnissaanut inassuteqarpugut, atuisut immiaaqqanik aalakoornartortaqanngitsunik, pissarsisinnaanissaasa naapertuunneranut Naalakkersuisut isumaqataammata.

Avatangiisit innarlitsaaliorneqarnissaanik Inatsisartut peqqussutaanni siunertaq innarlerneqassanngippat puukut maangaannarlu eqqarneqartut amerlisaqqinneqassanngippata, piaartumik aaqqiissuteqartoqarnissaanik kaammattuuterput Partii Naleqqamiit innersuussutigalugu siunnersuut imm. 58 Partii Naleqqamiit taamatut oqaaseqarfigalutigu ataatsimiititaliani susassaartuni suliarineqarnissaa innersuussutigaarput.

Taamatut Inatsisartut aalajangiiffigisassaattut siunnersuut imm. 58 oqaaseqarfigeriarlutigu Inatsisartut aalajangiiffigisassaattut siunnersuutip aappaa imm. 181 imatut oqaaseqaateqarfigissavarput

Imm 181

Inatsisartunut ilaasortaq Nivi Olsen, Demokraatit Naalakkersuisut peqquneqarnissaanik Inatsisartut aalajangiiffigisassaattut siunnersuuteqarputit Immiaaqqat imeruersaatillu qillertuusaniittut Kalaallit



Nuuk 22. marts 2019

UPA 2019/58

UPA 2019/181

Jens Napätôk, Partii Naleraq

Nunaanni tamarmi nioqquataalersinnaaqullugillu immiaaqqat imeruusaatillu puui pillugit nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaasilluni qillertuusat aamma kalaallit nunaanni utertitsisarnermut ilaalersillugit.

Inatsisartunut ilaasortaq Nivi Olsen Partii Naleqqamiit qujaffigerusuppatsigit taamatut siunnersuuteqarninnut.

Partii Naleqqamiit siunnersuutigineqartoq iluarisimaaratsigu oqaatigissavarput aammalu immikkoortoq 58-imi oqaatigisatsinnut attuumassuteqarluinnarluni, taamaattorli siunnersuutip aporfissalersuisimanerit akitsuusersuisimanerillu niuertunut aammalu minnerunngitsumik pisisartunut pisiassanik akisunerusumik kinguneqartitsisartut maanna uani siunnersuummi qaqilerneqarsinnaanerit periarfissinneqarpoq.

Partii Naleqqami isumaqarpugut pisisartut qitiusariaqalersut, tassa naatsumik oqaatigalugu nunap inui qitiutillugit taakkulu avatangiisai qitiutillugit aqqissuussaanerput ingerlasariaqalersoq.

Nioqqutissat akikinnerusut nunap inuinit aqqutissiuuttariaqalerluinnarput, maannakkut killiffipput eqqarsaatigalugu nioqqutissat akii akisuallaarujussualersimapput, aporfissalersuinerit aammalu akitsuusersuinerit annertuallaarujussuarmata.

Tamatuma ilagaat uani siunnersuummi qaqilerneqartut, tassalu imeruusaatit assigiinngitsut puui peqquataallutik akit qaffasippallaarujussuarput

nunatsinni aammalu nunatsinni najugaqartut toqqarsinnaasai pisiassat killilersorneqarpallaarujussuarlutik, taamaasilluni pisisartut uani qitiutinneqarunnaarsimallutik.

Eqaannerusumik pitsaannerusumik aammalu nunap inuisa pisariaqartitai pisiarerusutai aammalu minnerunngitsumik akikinnerusunik akeqartunik aallaavilinnik aqqissuusseqqinnissatsinnut piffissanngorpoq.

Pituttorsimannngitsumik aammalu aporfissalersorsimannngitsumik niuerneq ingerlanneqartariaqalerpoq, pisisartut akikinnerusumik pisiassaqaarsinnaanissaat qitiutinnerlugu aqqutissiuisariaqalersugut Partii Naleqqamiit isumaqarpugut.

Nutaamik nalilersueqqinnissami siunertaqartumik ataatsimiititaliami siunnersuut sukumiisumik suliarineqariaqartoq Partii Naleqqamiit innersuussutigerusupparput.

Ilanngullugu nalilersoqquarput niuertunut aammalu pisisartunut akitsorsaataasartut nalilersorluaqqullugit. Akitsuutit gruppe-nut normulersorlugit iliorarneqarsimasut qiviarutsigit ilaatigut takuneqarsinnaavoq sodavand-i qillertuusamiittoq eqqunneranut puuginnaanut akitsuuteqartoq 3 kr. 50 øre-imik taavalu sukumut literimut, taavalu imeruusaatinut kylsyretalinnut akitsuut literimut 7,50, taamaasilluni qallunaat nunaanni akitsuuteqaqisumi sodavand-it angisuut 2 literit akitsuutaa moms-ia ilaalugit ilanngutereerlugit 6,95-eqartartoq aqqutaa nunatsinnut assartornissaanut suli ilanngunnaguluunniit qangali 25-30 kr akiata tikereerpa, ila



Nuuk 22. marts 2019

UPA 2019/58

UPA 2019/181

Jens Napätôk, Partii Naleraq

pissutsit taamaattut akuersaaginnarlugit ingerlalersimanerput nalilersorlugulu aqqissuusseqqittariaqarluinnalersimavugut.

Taamaammat Partii Naleqqamiit siunnersuut tamakkiisumik tapersersugarput ajuusaarnarpoq Naalakkersuisut aammaarlutik ukiorpassuannortuni misissuiffigineqartarsimasoq 2020-imi ataatsimiinnissamut kinguarsaqqillugu aammaarlutik misissuisoqaqqinnissaanik siunnersuuteqarlutik allannguutissamik siunnersuuteqarmata.

Misissuinerpassuit ingerlanneqareernikuupput, suligasuarluni aqqiisoqarasuarniarli – Niuertut akikinnerusumik periarfissinniarlik aammalu taamatut minnerunngitsumik pisisartut akikinnerusumik pisiassaqarsinnaalernissaannut una aqqutissiuinerit siulliit ilaginiarlissuk akitsorsaait aporfissalersuinerit amerlavallaaleqaat.

Partii Naleqqamiit suliaq kinguarsaqqinnagu aappassaaneertinnagu suliarineqarniarli Taamatullu Naalakkersuisut peqquneqarnissaanik aqqiissutissamik taamatullu allannguutissamik isumaliutissiissut aqqutigalugu maani aappassaaniigassanngorlugu saqqummiisoqartoqartussanngorlugu.

Taamatut oqaaseqarluta siunnersuut imm 58 aammalu minnerunngitsumik imm. 181 tapersersorlutigit Partii Naleqqamiit oqaaseqarfigaarput, taamatullu oqaaseqarnitsinni siunnersuutigut ilanngullugit ataatsimiititaliami nalilersorluarneqassasut neriutugalutigu.

Qujanaq.